



## " KEPENTINGAN SOLAT DALAM KEHIDUPAN SEHARIAN "

الْحَمْدُ لِلَّهِ الْقَائِلِ: وَمَا أَمْرًا إِلَّا لِيَعْبُدُوا اللَّهَ  
مُخْلِصِينَ لَهُ الدِّينَ حُنَفَاءَ وَيُقِيمُوا الصَّلَاةَ وَيُؤْتُوا  
الزَّكَاةَ وَذَلِكَ دِينُ الْقِيَمَةِ .

أَشْهَدُ أَنْ لَا إِلَهَ إِلَّا اللَّهُ وَحْدَهُ لَا شَرِيكَ لَهُ  
وَأَشْهَدُ أَنَّ مُحَمَّدًا عَبْدُهُ وَرَسُولُهُ. اللَّهُمَّ صَلِّ  
وَسَلِّمْ عَلَى سَيِّدِنَا مُحَمَّدٍ وَعَلَى آلِهِ وَأَصْحَابِهِ  
أَجْمَعِينَ.

أَمَّا بَعْدُ، فَيَا أَيُّهَا الْمُسْلِمُونَ! اتَّقُوا اللَّهَ، أَوْصِيكُمْ  
وَأَيَّايَ بِتَقْوَى اللَّهِ فَقَدْ فَازَ الْمُتَّقُونَ. قَالَ اللَّهُ  
تَعَالَى: يَا أَيُّهَا الَّذِينَ ءَامَنُوا اتَّقُوا اللَّهَ حَقَّ تَقَاتِهِ وَلَا  
تَمُوتُنَّ إِلَّا وَأَنْتُمْ مُسْلِمُونَ.



## Sidang Jumaat Yang Dirahmati Allah,

Saya menyeru agar kita bersama-sama meningkatkan ketakwaan kita kepada Allah subhanahu wataala dengan melaksanakan segala perintahnya dan meninggalkan segala larangannya. Marilah kita memperbanyakkan zikir kepada Allah s.w.t. dan memperbanyakkan selawat serta salam keatas junjungan besar Nabi Muhammad saw di samping sentiasa berusaha melaksanakan segala sunnahnya. Mudah-mudahan ianya akan memberikan manfaat kepada kita di dunia dan di akhirat.

Tajuk khutbah kita pada kali ini adalah **"KEPENTINGAN SOLAT DALAM KEHIDUPAN SEHARIAN"**.

## Sidang Jumaat Yang Dirahmati Allah,

Solat merupakan rukun Islam kedua yang wajib ditunaikan setelah mengucap dua kalimah syahadah. Perintah mendirikan solat ini telahpun bermula semenjak berlakunya satu peristiwa besar di dalam Islam yang dilalui oleh baginda Rasulullah SAW iaitu peristiwa Israk dan Mikraj. Solat mestilah dilaksanakan dengan segera mengikut waktu-waktu yang telah ditentukan oleh Allah SWT sebagaimana firman-Nya dalam surah an-Nisa ayat 103 :

فَإِذَا قَضَيْتُمُ الصَّلَاةَ فَادْكُرُوا اللَّهَ قِيَمًا وَقُعُودًا  
وَعَلَىٰ جُنُوبِكُمْ ۚ فَإِذَا اطْمَأْنَنْتُمْ فَأَقِيمُوا الصَّلَاةَ ۚ



إِنَّ الصَّلَاةَ كَانَتْ عَلَى الْمُؤْمِنِينَ كِتَابًا مَّوْقُوتًا



*"Kemudian apabila kamu telah selesai mengerjakan sembahyang, maka hendaklah kamu menyebut dan mengingati Allah semasa kamu berdiri atau duduk, dan semasa kamu berbaring. Kemudian apabila kamu telah merasa tenteram (berada dalam keadaan aman) maka dirikanlah sembahyang itu (dengan sempurna sebagaimana biasa). Sesungguhnya sembahyang itu adalah satu ketetapan yang diwajibkan atas orang-orang yang beriman, yang tertentu waktunya".*

### **Sidang Jumaat Yang Dirahmati Allah,**

Ibadat solat mempunyai kepentingannya dan berkait rapat dengan kehidupan manusia. Di antara kepentingan solat yang dapat mempengaruhi kehidupan seharian kita ialah solat dapat membina keperibadian dan akhlak yang mulia. Ibadat solat dapat mempengaruhi jiwa seseorang hamba untuk berakhlak dengan akhlak yang mulia. Apabila solat dapat dikerjakan secara istiqamah, maka jiwa kita akan mengalami perubahan dari satu keadaan yang buruk ke satu tahap yang lebih baik. Dengan solat, seseorang akan belajar mengenai sifat sabar, tenang, bersopan dan berlemah lembut sepanjang melakukan pekerjaan-pekerjaan solat. Secara tidak langsung, amalan ini akan dapat mendidik seseorang dan membiasakannya dengan akhlak-akhlak yang baik di dalam kehidupan sehariannya.

Firman Allah SWT dalam surah al-Maarij ayat 19 - 23:



﴿ ۱۹ ﴾ إِنَّ الْإِنْسَانَ خُلِقَ هَلُوعًا إِذَا مَسَّهُ الشَّرُّ جَزُوعًا ﴿ ۲۰ ﴾ وَإِذَا مَسَّهُ الْخَيْرُ مَنُوعًا ﴿ ۲۱ ﴾ إِلَّا الْمُصَلِّينَ ﴿ ۲۲ ﴾ الَّذِينَ هُمْ عَلَى صَلَاتِهِمْ دَائِمُونَ ﴿ ۲۳ ﴾

*"Sesungguhnya manusia itu dijadikan bertabiat resah gelisah (lagi bakhil kedekut). Apabila ia ditimpa kesusahan, dia sangat resah gelisah. Dan apabila ia beroleh kesenangan, ia sangat bakhil kedekut. Kecuali orang-orang yang mengerjakan sembahyang. Iaitu mereka yang tetap mengerjakan sembahyangnya".*

Ibadat solat dapat menjaga pelakunya daripada melakukan perkara-perkara mungkar dan dosa serta mengikut hawa nafsu. Apabila solat dilakukan dengan sempurna dan khusyuk, ia akan dapat mempengaruhi jiwa pelakunya untuk tunduk dan taat kepada perintah Allah SWT. Pada masa yang sama juga, ia akan dapat mencegah pelakunya dari perkara-perkara keji serta membimbingnya ke jalan kebaikan dan sifat-sifat yang terpuji. Dalam hal ini, ada diriwayatkan bahawa nabi Syuaib A.S. pernah memerintahkan kaumnya agar mendirikan solat kerana solat dapat mendorong mereka melakukan kebaikan dan mencegah kemungkaran. Lalu kaumnya menjawab sebagaimana difirmankan oleh Allah SWT dalam surah Huud ayat 87 :



قَالُوا يَشُعَيْبُ أَصَلَوْتُكَ تَأْمُرُكَ أَنْ نَتْرِكَ مَا  
يَعْبُدُ ءَابَاؤُنَا أَوْ أَنْ نَفْعَلَ فِي أَمْوَالِنَا مَا نَشَاءُ  
إِنَّكَ لَأَنْتَ الْحَلِيمُ الرَّشِيدُ

*"Mereka (kaumnya) berkata; wahai Syuaib, apakah solatmu (yang banyak itu) menyuruhmu perintahkan kami supaya meninggalkan apa yang disembah oleh datuk nenek kami atau supaya kami tinggalkan apa yang kami suka lakukannya dalam menguruskan harta kami? Sesungguhnya engkau (wahai Syu'aib) adalah orang yang penyabar, lagi bijak berakal (maka bagaimana pula engkau menyuruh kami melakukan perkara yang bertentangan dengan kebiasaan kami)?"*

### **Sidang Jumaat Yang Dirahmati Allah,**

Di antara kepentingan solat juga adalah ia menjadi jalan keluar bagi orang yang beriman apabila menghadapi sebarang kesulitan atau kesusahan. Sesungguhnya memang tidak dapat dinafikan, bahawa setiap manusia akan menghadapi ujian dalam hidup sama ada ujian harta, ujian ketakutan, kelaparan dan lain-lain lagi. Justeru solat adalah merupakan satu-satunya cara yang paling mujarab bagi seorang hamba yang ingin meminta pertolongan dan perlindungan daripada Allah SWT. Dengan solat, jiwa orang yang beriman akan menjadi tenang dan tenteram, lantas mereka dapat mengharungi segala ujian dan cubaan dengan tabah dan bertawakal kepada Allah SWT.



Rasulullah s.a.w, ketika mana baginda merasa resah dan terhimpit disebabkan oleh penghinaan kaum musyrikin terhadapnya, maka Allah SWT telah memerintahkan baginda supaya mendirikan solat dan berzikir kepada-Nya. Hal ini ditegaskan oleh Allah SWT melalui firman-Nya dalam surah al-Hijr ayat 97-98 :

وَلَقَدْ نَعَلْمُ أَنَّكَ يَصِيقُ صَدْرُكَ بِمَا يَقُولُونَ ﴿٩٧﴾  
فَسَبِّحْ بِحَمْدِ رَبِّكَ وَكُنْ مِنَ السَّاجِدِينَ ﴿٩٨﴾

*"Dan demi sesungguhnya Kami mengetahui, bahawa engkau bersusah hati dengan sebab apa yang mereka katakan. Oleh itu, bertasbihlah engkau dengan memuji Tuhanmu, serta jadilah dari orang-orang yang sujud(solat)".*

Selain daripada itu, solat juga dianggap sebagai pembuka jalan atau pemudah cara yang dapat mempermudah rezeki kita. Sebagai hambanya yang beriman, kita mestilah menerima hakikat bahawa setiap rezeki yang diterima adalah datangnya daripada Allah SWT. Dia berhak memberikan rezeki kepada sesiapa yang dikehendakiNya dan Dia juga berhak menahan rezeki kepada sesiapa yang dikehendaki-Nya. Allah SWT telah berfirman dalam surah al-A'raf ayat 96 ;

وَلَوْ أَنَّ أَهْلَ الْقُرَىٰ ءَامَنُوا وَاتَّقَوْا لَفَتَحْنَا عَلَيْهِم بَرَكَاتٍ مِّنَ السَّمَاءِ وَالْأَرْضِ وَلَٰكِن كَذَّبُوا فَأَخَذْنَاهُم بِمَا كَانُوا يَكْسِبُونَ ﴿٩٦﴾



*"Dan (Tuhan berfirman lagi): sekiranya penduduk negeri itu, beriman serta bertaqwa, tentulah Kami akan membuka kepada mereka (pintu pengurniaan) yang melimpah-limpah berkatnya, dari langit dan bumi, tetapi mereka mendustakan (Rasul kami), lalu Kami timpakan mereka dengan azab seksa disebabkan apa yang mereka telah usahakan".*

Sesungguhnya orang-orang yang ditahan rezeki mereka adalah disebabkan dosa-dosa yang mereka lakukan, dan mereka juga tidak menunaikan hak-hak Allah SWT. Oleh kerana itu, setiap daripada kita yang mengaku beriman kepada-Nya, wajib menunaikan hak-hak Allah SWT dengan melaksanakan ibadah solat dan yang lainnya agar rezeki yang telah ditentukan oleh Allah SWT akan diturunkan dengan mudah dan mendapat keberkatan daripada-Nya.

### **Sidang Jumaat Yang Dirahmati Allah,**

Sesungguhnya ibadah solat merupakan hak Allah SWT yang paling utama untuk kita laksanakan. Melalaikan ibadah solat atau meninggalkannya bererti kita telah merendah-rendahkan hak Allah SWT. Adapun orang yang merendah-rendahkan hak Allah SWT ini pasti akan mendapat akibat dan balasan azab yang sangat pedih daripada-Nya. Di antara akibat melalaikan dan meninggalkan ibadah solat ialah;

1. Mereka dianggap sebagai kufur dan juga munafik
2. Mereka tergolong di dalam golongan yang dimusuhi oleh Rasulullah s.a.w sehinggalah mereka mendirikan solat
3. Hati mereka akan menjadi gelap dan tidak mendapat nur hidayah daripada Allah SWT



4. Harta benda dari hasil usaha mereka tidak mendapat keberkatan, bahkan menjadi punca kecelakaan kepada mereka.

Selain daripada itu, perkara yang amat ditakuti apabila kita meninggalkan ibadat solat ialah mati dalam keadaan *su'ul khatimah*. Diriwayatkan bahawa Rasulullah s.a.w. pernah melihat seorang yang sedang solat, namun tidak menyempurnakan rukuknya dan tergesa-gesa dalam sujudnya, maka baginda bersabda;

*"Seandainya orang ini meninggal dalam keadaan seperti ini, maka ia meninggal bukan dalam agama Muhammad s.a.w."*

*(Riwayat Tabrani)*

### **Sidang Jumaat Yang Dirahmati Allah,**

Sebagai kesimpulan daripada khutbah pada hari ini, bahawa kewajipan ibadah solat bukanlah sebenarnya suatu bebanan kepada kita semua, sebaliknya ia mempunyai banyak kebaikan dan kepentingan yang dapat dimanfaatkan di dalam kehidupan seharian kita. Di antara manfaat dan kebaikan solat ini ialah;

1. Ia dapat membantu diri kita, keluarga dan juga masyarakat kita untuk membina generasi yang baik akhlak dan budi pekertinya.
2. Ibadat solat juga dapat membantu kita dalam menangani pelbagai gejala yang merosakkan kehidupan masyarakat kita seperti rasuah, membunuh, merompak, zina dan perbuatan-perbuatan maksiat yang lain.
3. Ibadat solat juga dapat memotivasikan diri kita untuk terus tabah menghadapi segala cabaran yang datang kepada kita.





4. Ibadat solat juga menjadi kunci utama untuk kita mendapatkan rezeki yang halal dan diberkati oleh Allah SWT.

Justeru, marilah kita bersama-sama berusaha meningkatkan kualiti solat kita setiap hari agar kehidupan yang kita jalani pada hari ini akan menjadi lebih baik dan lebih sempurna serta mendapat keberkatan daripada Allah SWT.

أَعُوذُ بِاللَّهِ مِنَ الشَّيْطَانِ الرَّجِيمِ  
أَلَمْ تَرَ أَنَّ اللَّهَ يُسَبِّحُ لَهُ مِنْ فِي السَّمَوَاتِ وَالْأَرْضِ  
وَالطَّيْرِ صَافَّتِ كُلُّ صَلَاتِهِ وَتَسْبِيحُهُ  
وَاللَّهُ عَلِيمٌ بِمَا يَفْعَلُونَ

"Tidakkah engkau mengetahui bahawasanya Allah (yang Maha Esa dan Maha kuasa) sentiasa bertasbih kepadanya sekalian makhluk yang ada di langit dan di bumi serta burung-burung yang terbang berbaris di angkasa? masing-masing sedia mengetahui (menurut keadaan semulajadinya) akan cara mengerjakan ibadatnya kepada Allah dan memujinya; dan Allah Maha mengetahui akan apa yang mereka lakukan".

(An-Nur : 41)



بَارَكَ اللَّهُ لِي وَلَكُمْ بِالْقُرْآنِ الْعَظِيمِ،  
وَنَفَعَنِي وَإِيَّاكُمْ بِمَا فِيهِ مِنَ الْآيَاتِ وَالذِّكْرِ  
الْحَكِيمِ وَتَقَبَّلَ مِنِّي وَمِنْكُمْ تِلَاوَتَهُ، إِنَّهُ هُوَ  
السَّمِيعُ الْعَلِيمُ.

أَقُولُ قَوْلِي هَذَا وَأَسْتَغْفِرُ اللَّهَ الْعَظِيمَ لِي  
وَلَكُمْ وَلِسَائِرِ الْمُسْلِمِينَ وَالْمُسْلِمَاتِ،  
فَاسْتَغْفِرُوهُ إِنَّهُ هُوَ الْغَفُورُ الرَّحِيمُ.



## KHUTBAH KEDUA

الْحَمْدُ لِلَّهِ الَّذِي جَعَلَنَا مِنَ الْمُسْلِمِينَ،  
وَرَزَقَنَا مِنَ الطَّيِّبَاتِ. أَشْهَدُ أَنْ لَا إِلَهَ إِلَّا اللَّهُ  
وَحْدَهُ، لَا شَرِيكَ لَهُ، وَأَشْهَدُ أَنَّ مُحَمَّدًا عَبْدُهُ  
وَرَسُولُهُ.

اللَّهُمَّ صَلِّ وَسَلِّمْ وَبَارِكْ عَلَى سَيِّدِنَا مُحَمَّدٍ  
وَعَلَى آلِهِ وَصَحْبِهِ وَمَنْ تَبِعَهُمْ بِإِحْسَانٍ إِلَى  
يَوْمِ الدِّينِ. أَمَّا بَعْدُ، فَيَا عِبَادَ اللَّهِ، اتَّقُوا اللَّهَ  
فَقَدْ فَازَ الْمُتَّقُونَ. قَالَ اللَّهُ تَعَالَى: إِنَّ اللَّهَ  
وَمَلَائِكَتَهُ يُصَلُّونَ عَلَى النَّبِيِّ يَا أَيُّهَا الَّذِينَ  
آمَنُوا صَلُّوا عَلَيْهِ وَسَلِّمُوا تَسْلِيمًا.



اَللّٰهُمَّ صَلِّ وَسَلِّمْ عَلٰى سَيِّدِ الْمُرْسَلِيْنَ  
وَارْضَ اللّٰهُمَّ عَنْ اَصْحَابِهِ وَقَرَابَتِهِ وَاَزْوَاجِهِ  
وَذُرِّيَّاتِهِ اَجْمَعِيْنَ. اَللّٰهُمَّ اغْفِرْ لِلْمُسْلِمِيْنَ  
وَالْمُسْلِمَاتِ وَالْمُؤْمِنِيْنَ وَالْمُؤْمِنَاتِ الْاَحْيَاءِ  
مِنْهُمْ وَالْاَمْوَاتِ، اِنَّكَ سَمِيْعٌ قَرِيْبٌ مُّجِيْبٌ  
الدَّعْوَاتِ وَيَا قَاضِيَ الْحَاجَاتِ. اَللّٰهُمَّ اِنَّا  
نَسْأَلُكَ اَنْ تَحْفَظَ بَعِيْنَ عِنَايَتِكَ الرَّبَّانِيَّةَ، جَلَالَةَ  
مَلِكِنَا الْمُعْظَمِ سُلْطَانَ سَلَاطُوْر، سُلْطَانَ شَرَفِ  
الدِّيْنِ اَدْرِيسِ شَاهِ الْحَاجِ ابْنِ الْمَرْحُومِ سُلْطَانَ  
صَلَاحِ الدِّيْنِ عَبْدِ الْعَزِيْزِ شَاهِ الْحَاجِ. اَللّٰهُمَّ اِنَّا  
نَسْأَلُكَ الْهُدَايَةَ وَالتَّوْفِيْقَ، وَالصِّحَّةَ وَالسَّلَامَةَ  
لِوَلِيِّ عَهْدِ سَلَاطُوْر، تَعْكُوْ اَمِيْرِ شَاهِ ابْنِ  
السُّلْطَانَ شَرَفِ الدِّيْنِ اَدْرِيسِ شَاهِ الْحَاجِ يَا



ذَالْجَلَالِ وَالْإِكْرَامِ. اللَّهُمَّ أَطِلْ عُمْرَهُمَا  
مُصْلِحِينَ لِلْمُوظَّفِينَ وَالرَّعِيَّةِ وَالْبِلَادِ، وَبَلِّغْ  
مَقَاصِدَهُمَا لِطَرِيقِ الْهُدَى وَالرِّشَادِ.

Ya Allah, Engkaulah Tuhan yang Maha berkuasa, kami bersyukur kehadiran-Mu yang telah mengurniakan kami rahmat dan nikmat, sehingga kami dapat meneruskan usaha ke arah memperkukuhkan negara umat Islam khususnya negeri Selangor, sebagai negeri yang maju, sejahtera dan berkeadilan.

Justeru kami mohon kehadiran-Mu ya Allah, tetapkanlah iman kami, terimalah amalan kami, kukuhkanlah perpaduan kami, murahkanlah rezeki kami, kayakanlah kami dengan ilmu yang bermanfaat, suburkanlah jiwa kami dengan budi pekerti yang mulia, kembalikanlah kami ke jalan yang Engkau redhai, lindungilah kami daripada bala bencana dan ujian-Mu yang berat supaya dengan demikian, negeri kami akan sentiasa bertambah makmur dan berkat.

Ya Allah, Tuhan yang mempunyai kekuasaan dan kebesaran. Tuhan penganugerahan keselamatan dan kesejahteraan. Kami mohon ke hadiratMu, cucurilah rahmat ke atas arwah-arwah perwira-perwira negara yang syahid di medan pertempuran di Lahad Datu, Sabah. Semadikanlah roh-roh mereka bersama para syuhada' dan solihin. Demikian jua kepada yang tercedera, dapat dipulihkan segera kesihatan mereka. Kurniakan kepada keluarga mereka kesabaran atas bencana yang menimpa dan keredhaan hati menerima qada' dan ketentuan daripadaMu.



Ya Allah, selamatkanlah perwira-perwira kami yang masih bertugas di sana. Dengan kekuasaanMu jua, dapat kiranya ditamatkan segala pertempuran dan pertumpahan darah.

Ya Allah, bukannya hati kami untuk mendirikan solat fardhu lima waktu dan ibadah zakat sebagaimana yang telah Engkau wajibkan. Berkatilah hidup orang-orang yang melaksanakan tuntutan berzakat, menyayangi fakir dan miskin. Sucikanlah harta dan jiwa mereka, lindungilah golongan fuqara' dan masakin daripada kekufuran dan kefakiran yang berpanjangan.

Demikian jua Ya Allah, tambah dan luaskanlah rezeki orang yang mewakafkan hartanya, terimalah wakaf mereka dengan ganjaran pahala yang berkekalan hingga ke hari akhirat.

رَبَّنَا هَبْ لَنَا مِنْ أَزْوَاجِنَا وَذُرِّيَّاتِنَا قُرَّةَ أَعْيُنٍ  
وَأَجْعَلْنَا لِلْمُتَّقِينَ إِمَامًا. رَبَّنَا ءَاتِنَا فِي الدُّنْيَا  
حَسَنَةً وَفِي الْآخِرَةِ حَسَنَةً وَقِنَا عَذَابَ النَّارِ. عِبَادَ  
اللَّهِ، إِنَّ اللَّهَ يَأْمُرُ بِالْعَدْلِ وَالْإِحْسَانِ وَإِيتَايَ ذِي  
الْقُرْبَىٰ وَيَنْهَىٰ عَنِ الْفَحْشَاءِ وَالْمُنْكَرِ وَالْبَغْيِ  
يَعِظُكُمْ لَعَلَّكُمْ تَذَكَّرُونَ ﴿٩﴾



فَاذْكُرُوا اللَّهَ الْعَظِيمَ يَذْكُرْكُمْ وَاشْكُرُواهُ عَلَىٰ  
نِعْمَتِهِ يَزِدْكُمْ، وَأَسْأَلُوهُ مِنْ فَضْلِهِ يُعْطِكُمْ  
وَلَذِكْرُ اللَّهِ أَكْبَرُ وَاللَّهُ يَعْلَمُ مَا تَصْنَعُونَ.